

Mulins e rodas-mulin ella Cadi

Emprova da sclarir igl origin e destin dils indrezs cun roda d'aua da Paul Tomaschett e Tobias Deflorin (cumpariu en Annalas, annada XCVI)



Tujetsch




Tagl ord la gravura da Bleuler e Falkeisen: «Vue de la jonction des deux sources du Rhin antérieur, celui du Mont Badus et du Crispalt, prise près de Chiamut». Il paesagist Johann Ludwig Bleuler ei staus anno 1817 en Tujetsch. Siu mulin ault - d'aspect plitost niev - pudess esser il successur dil mulin bass staus pli da vegl da l'otra vart da l'aua, medemamein sut in grep. Pader Placi a Spescha ha fatg stem da quel «che stetti leu da vegl enneu», mond ina damaun d'uost 1785 sil Badus cul decan Fintan Birchler dalla claustra da Rheinau.

Tschamut

Ils avdonts «dadains gl'uat» ein mai stai pupernai cun èrs da garnezi. Las uclivas situadas cheu denter 1500 e 1800 meters sur mar segidavan culs chischners, quels famus madiraders da graun. Igl ei per nus carstgauns disai culs centers da cumpra insumma buca pusseivel da s'imaginar tgei stentas e fadigias ei duvrava en quels loghens selvadis per nutrir e vestgir ils ses cun dil siu. Ed ils habitonts eran inagada detg numerus. Anno 1768 dumbra Tschamut 67 olmas e Selva schizun 95.

Ils Tschamuters havevan tschentau lur mulins dadens l'ucliva agl ur dalla via veglia dil Cuolm d'Ursera. Els partevan senza dubi ils indrezs culs vischins da Surpalits, schiditg che quell'ucliva isolada ei stada habitada secapescha. Il Rein dalla Val Val haveva flad e forza d'avonz per mover las rodas da quels emprems mulins sisum la Cadi. Sin in maletg da 1817 muossa il pictur turitges Johann Ludwig Bleuler cun tratgs marcants las cascadas dil dargun ed ina mudesta tegia-mulin a garnugl el fiep sut ina preit crap.

Il num Prau Mulins silla riva seniastra dil Rein da Tuma cumprova aunc oz quei ch'ei stau inaga agl ur dil funs che stauscha viers il torrent dalla Val Val: mulins e matei era in fallun. Igl expert po aunc oz veser dadens l'aua las restonzas d'in dutg. L'ucliva da Surpalits ei svanida avon tschentaners, la nauscha lavina da 1809 ha derschiu treis, quater clavaus da Prau Mulins e probabel era ils indrezs hydraulics sper il dutg numnau. Il mulin sut il grep dado l'aua ha perencunter teniu petg aunc in pulit toc viaden el 19avel tschentaner. Mo cura che quel ei ius da rendiu eran la cultura da garnezi e da mulins gia fetg periclitadas. Il stradun dall'Alpsu ha lubiu da menar la muliziun a Rueras.



Selva. Mulin e fallun vi Sur Rain (Surrein), omisdus cun roda zanistrera. Fotografia prida neu digl ur dil Rein viers il sid, entuorn ils 1910. Hermann Weickel, Turitg.

Selva

Strusch ein ils dus Reins da Tuma e Curnera reuni, ch'els fan amogna lur auas als mulins da Selva. Al pei dil vitget, giu Plaun da Punt, existeva in mulinet cun roda bassa. In liung pluschein tschaffava l'aua en sut il Basto e targeva ella sil mulin. Ils Heleners - aschia numnavan ei ils Peders - han fatg ils muliners sil pli pauc 100 onns. A Gion Martin Peder, naschius 1793, ein suandai Giachen, Toni, in secund Gion Martin ed auters. Il mulin ei ius en cul davos tschentaner. In tschuppel onns eisi stau faners sillas restonzas da mir; mo in unviern da nevas han las lavinas sfraccau ils clavazeuls per adina. La mola-surain piazzada en in iert da flurs a Sedrun-Gonda ei ina dallas paucas memorias restadas dil vegl mulin da Plaun da Punt.

In secund mulin sesanflava vi da tschei maun dil Rein, vi Sur Rain a pèr cun in fallun. Ina gravura en itschal dils 1840 mantegn la cumparsa da quels baghetgs schumellins e dil mulin da Plaun da Punt da l'autra vart dall'aua. Tuts treis paran vegls. Tschentai giusut il vitg pon els esser mitschai levamein dil nausch incendi dils 15 d'october 1785. Cun lur semplia construcziun cubica fatga da lenna rodonda semeglian els fetg ils clavauets els praus sul piogn dil Rein.

Ils dus casetgs, stai cheu schiditg da cuminonza, ein da considerar pils davos da lur gener dadens gl'ual. Igl emprem ensiviars, alla fin bravamein sگردinaus, era in fallun. Giachen Antoni Deflorin ei staus siu davos possessur. Omisdus baghetgs havevan ina roda zanistrera. Ina risteina da 200 meters indichescha aunc oz il dutg-mulin che sederscheva el Rein immediat suenter ils sigliots sur las rodas. Ils vegls da Selva seregordan aunc che lur tats e tattas purtavan graun da moler vi Sur Rain. Giusep Antoni Loretz (1845-1924), maridaus cun ina Tudestga dalla Baviera e staus ell'America, ha fatg ina partida onns il muliner. Il davos possessur e muliner senumna Vigeli Venzin. Giusep Giger, siu schiender, e frars han bess giu il mulin ils 1927 circa e duvrau la lenna per baghegiar in faner da tschella vart da l'aua. Il viandont che banduna oz il stradun e serenda a Selva po admirar las duas molas avon l'emprema casa. - Entuorn ils 1940 ha Vigeli Venzin baghegiu in mulin pli modern giudem il vitg; mo il terribel incendi dils 11 da zercladur 1949 ha buca schanegiau el.

Mulinatsch

era inaga forsa la pli veglia dallas numerusas uclivas che Tujetsch ha piars enteifer ils tschentanners. Tgi ch'enquera ella oz, anfla mises silla spunda sid dalla Val Giuv rodund 1700 meters sur mar. Ils mulinets da Mulinatsch e Mulinatsch Sut - sapocu els ein svani - survevan als vischins da Caspaua, a quels da Planatsch, da Scangleras ella foppa schurmegiada sut

Planatsch, da Giuv (che dumbrava anno 1768 buca meins che tschun casadas cun 22 persunas), da Nurschei e probabel era da Clavadi situaua empau pli a bass. Pils habitonts da quels loghens magari exponi era ei daveras pli segir e cumadeivel da posseder agens mulins e fallun ella vischinonza che da descender en tuttas auras a Rueras. Ins astga puntuar en quei connex ch'ils purs dil temps vegl purtavan il graun si dies en bulschas e sacs u brentas-lenn ni bardigliavan el sin sliusas a mulin.



Rueras

Quei vitg ha midau fetg plaz ed aspect enteifer ils tschentanners. Inagada steva el propi sillas rivas dalla Val Mila. Las casas e clavaus sisum stevan si Candentschuns, debia baghetgs s'extendevan sur e sut la Giassa, sco ins numnava e numna aunc oz la via vedra. Ina tschecca part dil vitg tunscheva da Suloms oragiu entochen giuls Trutgs. El 18avel tschentaner dumbrava Rueras varga 200 habitonts, pia in bien ton dapl che Sedrun. Ils avdonts vivevan el segir, silmeins aschiditg ch'ils uauls dalla Val Pulanera e dalla Val Mila havevan pegns d'untgida avunda per tuttas nevasas. Mo dapi ch'els ein vegni dil meins, eisi stau ina resca da viver maneivel da l'aua da Mila.



Las catastrofas han buca fatg spetgar. En sia descripziun dalla Val Tujetsch rapporta pader Placi a Spescha dallas pli sgarscheivlas, quellas da 1749 e da 1817 che han purtau mort e malura a bia gliued ed animals, casas e clavaus. Scadina ha scuau giu Rein tschun mulins, in fallun ed ina resgia. In reporter dalla secunda numna ils proprietaris da quater baghetgs: il mulin dil Dumeni, il mulin da Giachen Schmed, quel dil Bisquolm ed il fallun dils Cavegns. Il vitg sez ei vegnius dislocaus plaun a plaun encunter damaun, ferton ch'ils indrezs d'aua reconstrui han stuiu esser vinavon marschei digl ual. Gliued setratga neutier ha meinsvart cattau in suttetg vi Suloms. Pils menaschis ch'ins ha turnau a baghegiar 1818 e suenter ein ins serestrenschius sin la riva seniastra dalla val; mo la cascharia ed il tschaler da caschiel schain sin la costa dretga sut la Giassa. Plirs nums ein aunc semanteni ella memoria da certas persunas cudischidas culla veta mistergnera da tschels onns: ils mulins dallas Venzinas (da Cristian Josef Venzin, mistral 1818-20) ual sut la resgia, il mulin dils Gion Flurins (dall'era da Gion Rest Riedi), il mulin dils Mugglis ed il muliner Gion Giachen Berther, naschius 1799. Nuota da far curvien che molas relaschadas pusavan avon decennis aunc tscheu e leu sillas rivas dalla Val Mila. Quella dil mulin dils Gion Flurins survescha dapi 1979 da plat-meisa silla piazza da giug vi Plaun da Pors.

Igl ei cheu il bien mument da far la revista dils menaschis e mistergners dallas davosas generaziuns.



La gronda part dils baghetgs ein manteni, aschia ch'igl ei buca grev da s'orientar. Dapi la construcziun dil stradun ei l'aua passada tras in tunnel sut la punt ora. Enviada sillas canals, menava ella la roda-mulin dils Giossis. Il mulin vegl po esser staus proprietad da scarvon da cumin Rest Luregn Lucas Cavegn. Il mars 1799, cura che las truppas franzosas ein s'avanzadas neu sul Cuolm d'Ursera, era Bibian Giossi muliner a Rueras. (Bibian para d'esser il surnum; ins sa s'imaginar ch'el deriva dalla mumma Bibiana Giossi-Giger da Sedrun.)



Havend fitgau pei cheu han ils Giossis, numnai semplamein ils muliners, sviluppau ina gronda activitad sper l'aua da Mila. Sep Antoni Giossi-Monn (1840-1915) fageva muliner, «pec», resgiader ed aunc bia auter. El mava sez casa per casa pil graun e purtava la frina anavos allas masseras. El duei haver baghegiu la stiva da paun, ina casetta bassa da mir partida en local per struclar ieli semglin e fuorn. Cheu fageva el il furner, vul dir scaldava il fuorn e metteva en sez ils pauns che las puras purtavan. Ei tuccava allura ad el in paun sin ina furnada da 30. Ina fotografia digl atelier Lang da Cuera, undrada 1913 cun la medaglia d'aur, ha reteniu oreifer la venerabla urdadira dil vegl muliner surprius dil fotograf avon igl esch da sia stiva da paun.

Rueras da tshels onns cul fallun da roda zanistrera e canals en bien stan. Seniester la resgia. Carta postala da Moriz Maggi, Glion.



Quater muliners da sia schlatta han priu la successiun: siu fegl Gion Antoni (1880-1953), Duri Battesta, Sep Antoni e Gion Battesta. Ils 1970 circa han ins calau da moler. Igl indrez, aunc en bien stan, ei vegnius vendius ordeifer. - Frina, paun ed ieli semglin eran uni stretgamein in cun l'auter. El baghetg-mulin era endrizzau ina pella cun treis pisuns per far frina e pasta semglin.

Sut il mulin, ualti datier dalla punt veglia, stava la scrinaria. Sia roda aulta sut la suosta era cun ses varga treis meters e 50 diameter per la letga pli gronda che quella dil mulin sisura. Cheu ha Christian Giachen (1878-1951, fegl da Sep Antoni muliner) trafficaui sia veta ora. Il Crest Giachen, sco el vegneva numnaus, aveva in dun tut aparti per indrezs mechanics. El e ses frars han baghegiu respectiv refatg la resgia, mulins, cundrezs da pisar, casas, nuegls e clavaus. Il fegl Gion Antoni ed ils biadis cun lur fatschenta flurenta ein i la medema via, secapescha tenend petg culla moderna.

Unviern a Rueras. Canals, mulin e scrinaria dils Giossis. La roda dalla scrinaria ei bein veseivla sut la suosta. La rasena lenna sut la punt indichescha la resgia. Ediziun Photoglob, Turitg.

L'aua era strusch dada giu dalla roda dil luvratori ch'ella vegneva menada sut la punt ora en direcziun dalla resgia. Il baghetg vegl eregius suenter la catastrofa da 1817 ei staus biars onns els mauns dalla famiglia Gieriet, da Hans Giachen (mistral 1826-28), in um ch'ei sestentaus fetg per l'erecziun dallas uestonzas encunter la lavina. Pli tard ein Sep Berther da Dieni, Schmeds (ils schinumai Stens), Cavegn,



Giossis ed auters stai acziunaris dalla resgia. Il scrinari Crest Giachen Giossi ha fatg ditg il resgiader en sia resgia nova, sustenius da divers commembers dalla famiglia avon e suenter. Che las canals sut la punt havevan tut speciala tila per la buobanaglia san ins s'imaginar. Ei capitava ch'ils pli gagliards targevan neu il barcun, vul dir bettevan giu l'aua. L'agnetga fermada dalla roda sussentava neuadora il resgiader ch'encureva denton adumbatten la bargada sbrigada davos las cantunadas.

Giusut il vitg, giun Trutgs sco ins scheva, stava in casetg brinatsch senza finiastras, apparentamein starschau, il fallun dils Giossis. Il muliner Sep Antoni duei haver eregiu el cheu sil sulom digl anteriur mulin dallas Venzinas. Cura ch'ei vegneva october giavinavan las palas l'aua silla roda zanistrera. Allora deva ei veta el fallun; ils treis pisuns sesalzavan per batter las monas glin purtadas neutier da mummas e mattas. Era cheu tuccava ei da salidar il muliner Giossi che retschaveva sin diesch poppas glin ina poppa per manischar e mantener il fallun.

Ils remarcabels baghetgs dalla veglia cultura purila existan buca pli. Il cundrez dil fallun, staus il davos proprietad dils cusrins Sep Antoni e Sigisbert Giossi, ei ius entuorn ils 1950 a Trun el Museum sursilvan nua ch'ei fuss aunc da cumpletar el. Mender stat ei culla sort dil mulin, dalla stiva da paun e digl indrez da far o ieli. Deplorablamein han ins schau ir empaglia bia utensils e tocca representativa che fagessen honor e buna pareta el museum local tuatschin.

Il mulin vegl ha teniu stendiu entochen alla fin dalla davosa uiara. Spussaus bravamein ha el allura stuiu untgir ad in mulin niev muentaus da forza electrica. Las parts duvreivlas han anflau suttetg e diever ad Alvagni. Entuorn ils 1949/50 ha inschignier Albert Lutz a Cuera acquistau las duas molas-mulin isadas sil peter pir, quella suren sco plat da meisa per siu curtin e l'otra per siu vischin. Quei fuss silmeins in'informaziun concernent las rudialas da granit che han fatg vetas da gliעד frina da paun e cuschina.

Ina brischeria da vinars d'ansauna, situada in tschancunet sut il fallun e stada tschentada sil sulom d'in vegl mulin, concludeva la fila da baghetgs sillas rivas dalla Val Mila. Hans Giachen Monn-Deflorin e siu fegl Giachen Antoni han barschau cheu onns ora vinars cugl indrez cumpraus da Leci Balzart da Cavorgia. Mo l'ordinaziun nova d'alcohol ha priu il muis dils brischavinars, e Luis Rensch da Darvella ha cumprau las buots e vanauns. Era Salins possedeve si'atgna destillaria, quella dil Zanetti. Ils fastitgs dalla pli aultsituada breneria dalla val, quella dils Riedis, fussen denton d'encurir sin 1800 meters sur mar a

Plaun Milez sut las stallas dall'alp da Tschamut.

Il scaldar e barschar endrida da sefermar in mument ell'antieriura fravia sper la fontauna amiez il vitg da Rueras. Cheu ha stalter Duri Venzin retschert in di d'atun 1799 la viseta d'in contingent da cavallaria russa. Ils menaders han sfurzau el d'enferrar lur cavalets alla moda cosaca, vul dir derschi entuorn e teni da sis umens en dies. Gion Fidel Caduff-Riedi (1788-1872) sco era siu fegl ed in nevs havevan lur fravia vi Suloms. Giachen Lurenz Caduff-Giossi (1861-1938) dalla tiarza generaziun, fravi, urer, dentist e leutier aunc cudischius cun in triep auters mistregns, haveva endrizzau el tschaler sut il luvratori da Crest Giachen Giossi ina mola muentada da l'aua, buca per moler mobein per mular uaffens. Cul temps eis el setratgs si sper il stradun e baghegiu leu casa e fravia nova. Victor Berther ha buca mo surpriu la professiun e la Tgesa Fravi da siu aug, mobein era furniu a mi preziasas notizias concernent ils vegls mistregns e mistergners da Tujetsch. Ils vischinadis da

Camiscolas e Zarcuns

possedevan bein a mesa via ton per in sco per l'auter in mulin silla riva dretga dil Strem, denter la via dalla staziun e la punt dalla viafier. Il num Prau Mulins ei restaus per perdetga empei dils baghetgs i a smerscha. Gest sur la bifurcaziun dallas vias stat l'antieriura cascharia communabla; mo ella ha da far nuot pli cun latg e caschiel.

Ella tgesa dils Vigeli pigns, la secunda casa dado la caplutta da Camiscolas, era installada la fravia da stalter Sep Lorenz Giacumet (1830-1900), enonuschent catschadur, cavacristallas e president da vischnaunca. En vesta dallas lavurs vid il stradun dall'Alpsu (1860-65) ha el baghiau ina fravia sur la punt da Camiscolas, giu ella foppa sper la via veglia dil Cuolm d'Ursera. Sia chezer patenta roda d'aua per alzar il marti grond duei haver fatg sensaziun, mo ha nuota propi giu il cuoz giavischau. Silsuenter ein ils Berthers da Camiscolas daventai possessurs dalla fravia, quels che han baghiau la via nova entochen tiel schinumnu «Caraun dils Berthers» sur Ursera. Il vonn secloma aunc adina la Fravia; denton stat silla strebla cantunada da ses mirs in ualer che sefutra in quex da fueina e fol, mazza e martials. E dil mulin staus inaga el plaunet sisura san ins zun pauc.

Sedrun-Salins

Tut ils menaschis d'aua da Sedrun stavan silla costa dretga dil Drun; mo quei «dragun» era pil pli memia rabiaus per seschar giavinar sillas rodas-mulin. Lur aua da catsch vegneva tschaffada ella Val Strem. Naven da leu tschuncanava in liung dutg ils praus da Salins. Dil vegl mulinanc ei restau dapi 1980 nuot

auter ch'ina risteina, mo vetas da glied ha il dutg surviu a Salins Sura ed a Salins Sut, duas uclivettas cun casas, clavaus e buntades. Salins dumbrava 27 habitonts ils anno 1768 e possedeava mulin e fallun. Salins Sura duei haver giu ina veglia fravia. Il num da Salins stat oravontut en connex cun ina veglia scarsinaria. Sche la famiglia Gisler dalla Val da Fier ei stada la fundatura u ha semplamein surpriu la fatschenta, ei grev d'eruir. Avon l'emprema uiara mundiala ha la famiglia Schmedt-Deragisch, avon sesenta a Cuera, acquistau la scarsinaria da Salins. Il bab Sep Antoni (1871-1954), il «vegl da Salins», e ses dus fegls han scarsinau cheu launa, Josef entochen 1947, Benedict aunc varga 20 onns dapli. Ditg ha ina rod'aulta prestatu la forza gronda laschond cul temps siu pensum ad ina ferma turbina. Egl iert sur la casa-scarsinaria lain restonzas da mir supponer vegls baghetgs; quels pon esser stai mulin e fallun. Mo in sulet datum survescha d'indezi. Il cudisch da mortoris relata dil buobet Gion Antoni Giacumet negaus 1890 ell'aua sper il fallun da Salins.



Casa mulin a Gonda, dils Soliva

Sedrun-Gonda

Il Dutg da Salins flessegiava viers Gonda, ditg libramein e pli tard en bischels, pli u meins parallelmein cul Drun. Sur la casa da Luis Hendry sisum Gionda (quei fuss la pronunzia tuatschina) possedevan plirs vischins in vegl mulin cun rod'aulta e fallun. Cura che la viafier dalla Furca-Alpsu ei vegnida eregida, ein lur dis stai dumbrai. La mola gronda, ina peisa crap, ruaussa agl ur d'in curtin, paucs meters naven dil binari.

El raiun dalla punt da Sedrun han ils Solivas praticau quei ch'ins seregorda divers mistregns cun dun e diligenza. Ins sa perseguitar silmeins quater, tschun generaziuns. Giachen Antoni, naschius alla fin dil 18avel tschentaner, ei staus in fravi-artist da num. Ses fegls Vigeli (1816-1881) e Giachen Antoni (1823-1864) ein sedistingui buca meins ella medema professiun. Giachen Antoni Soliva-Monn (fegl dil fravi Vigeli), pur e caluster, ha cumprau ils 6 da december 1902 da Sep Antoni Venzin il mulin a Gonda cun falluns da glin e dad ieli sco era la mesa resgia sut la punt.

L'autra part ei restada vinavon possess da Gion Antoni Monn; sia schlatta ha gudiu pli tard treis quartas da quei mun, ferton che ina quarta ei ida vi als Cavegns (a Giachen Giusep ed il davos a Placi). Pli baul ein las mudestas interpresas sur e sut la punt stadas els mauns da Giachen Antoni Beer da «Mollin»: dad el havevan ils Venzins acquistau anno 1879 il mulin niev, sco el vegn numnaus el contract da cumpra, cun falluns e stiva da paun e cun tuts «vertgs» ch'ei drova leutier inclus la mesadad dalla resgia; tschei miez apparteneva da vegl enneu als Monns. Poda ch'ils frars



La resgia da Sedrun stada possess da Sep Antoni Venzin, dils Monns e dils Solivas: in indrez cun duas rodas zanistreras, la gronda per la resgia (strusch veseivla el funs dall'emprema cascada) e l'otra giusut pil fallun baghegiaus vitier ella cantunada sidvest dalla resgia. Dessegn cun rispli 1897 da Johannes Weber (1846-1912) oriunds da Netstal el cantun Glaruna, paesagist e dessignader, plinavon illustrader da diversas ovras, oravontut publicaziuns dalla casa editura Orell Füssli a Turitg.



Resgia



Fallun

Martin Felici (1807-1864) e Sep Lorens Schmed (1815-1881) eran stai enzacons decennis ils capomuliners da Sedrun. Cun Chrest Anton Mucli e Giusep Frey, naschi 1795 resp. 1822, pon els haver formau in pulit quartet da muliners.

Morts gia anno 1915, ha Giachen Antoni Soliva-Monn buca saviu far ditg il muliner. Ses fepls, disai da giuven da luvrar, ein s'engaschai bein prest ell'agricultura e mistregn. Giachen Antoni (1885-1963) stat senza maridar, mo ei duront varga in miez tschentaner ventireivels da luvrar e barhar en sia cara «Tgesa Mulin» vieifer la punt. Cheu mulava el per temps bunamein di e notg el local da vart dretga e fageva denteren o ieli ella pella dasperas. La rod'aulta, piazzada el plaunterren dalla casa, surveva omisdu indrezs. Ella ei ida entochen ils 1930/35, suandada d'ina turbina entochen 1966. Il mulin va aunc, grazia alla forza electrica, mo plitost per smaccar e rumper graun che per far frina. La mola-suten che pusa vi pil mir encunter damaun mantegn per sesezza ils misteris da mulin e muliners.

Bunamein alla metta seschluitava il dutg-mulin sut la via ora e sittava, promts per novas aventuras, dallas canals dalla resgia giuadora. Quella ei stada onns ed onns la domena da Duri Vigeli Soliva-Beer. In dessegn d'anno 1897 e fotos d'entuorn 1900 muossan buoras rasenadas sur la resgia e plunas aissas entochen o encunter il Drun. Oz vesa la realitad ora auter. La resgia ha fatg plaz al baghetg dil schurmetg civil. Ei drova forsa empau fantasia per sepresentar la resgia da lezzas uras: la vart encunter sera cun canals, sclusadurs e cascadas e la funcziun dallas duas rodas zanistreras. L'emprema (remplazzada ca. anno 12 d'ina turbina) impundeva sias forzas per resgiar, ferton che quella giudem muentava aunc duront l'emprema uiara mundiala ils pisuns d'in fallun pustaus en ina dallas duas suostas che pusavan encunter la preit sut dalla resgia.

Ei descha da perseguitar il destin dil fallun. Ils anno 18 u 19 han ils Solivas translocou e reconstruiu el in tschancun plinengiu sper il vau dil Drun. Duri Vigeli duvrava ussa il plaz liber per deponer resgem, cutgnas ed auter rufid da lenna. Tenor professor Paul Scheuermeier era quei fallun da treis pisuns aunc en cumpleina forza e funcziun ils anno 1935. Suenten la secunda uiara ei sia stema tschessada tondanavon ch'el ei vegnius trits e scardalius. Vonzei ein umens dil rom vegni, han urentau la tocca duvreivla ed ein sestentai da salvar quei ch'era dign d'in plaz el museum. Il «fallun» construius da Vigeli Berther e ses scholars secundars regorda a liug e lavur da tschentaners vargai.

Il treifegl dils frars Soliva fuss buca cumplets senza il Gion Battista Soliva-Cavegn. El fa 20 onns e varga vitturin e carrotschier. Quei para d'esser stau in'excellenta premissa per arver da Nadal 1934 la pensiun Soliva sil plaz dall'anteriura fravia da Luis Schmed (1863-1954).

Il plaid «fravia» cudezza da dar in sguard anavos. S'entelli che Sedrun ha giu fravis versai ed originals. Gion Bistgaun Beer (1861-1954) ha baghegiu la fravia nova giu sper via suenter ch'el haveva stuiu secuntentar ina partida onns cul tschaler ella casa dalla «Derungsa». Fravi Vigeli Beer, naschius 1777, po esser staus dalla medema schlatta. Ils 26 da mars 1848 ha stalter Crest Valentin Cavegn vendiu sia casa sin cadruvi inclusiv la fravia suten per dar albiert alla scola. Rodund quater decennis ein ils scolars i cheu en ed ora. Dalla medema schlatteina ein plirs fravis Cavegn stai, il Giachen Lorenz, il Vigeli Giusep ed il Sep Antoni, tuts treis naschi entuorn ils 1830. Ei fa forse surstar d'endriescher che ina lavina dil december 1808 ha cuvretg ina fravia a Sedrun. Ed in sgol sur treis tschentanners ora lubescha da finir cul Petter Fravij documentaus pigl onn 1500.

En ina vallada cun bia biestga gronda, cauras e selvaschinas deva ei secapescha era tgirs, pials e curom. Avon 200 onns e varga fagevan marcadonts dalla Val San Giacomo el sid dil Spligia in negozi cun pials e tgirs. Lur intschess da commerci tunscheva tochen ella Val Tujetsch. Pil 19avel tschentaner ein dus cuntschapials oriunds da Tschamut bein enconuschents: ils gerbers Gion Bistgaun Deflorin (1827-1900) e siu fegl Michel ch'ei vonzeivi setratgs a Strada sper Glion.

Bugnei

ha conservau entochen oz il num Mulinets per ils funs che tonschan a Rein en fuorma da cugn. Leugiu sper il Drun da Bugnei eran las tegiettas ch'ins astga supponer cun roda bassa, strusch periclitadas dalla lavina. Sper Bugnei cumpigliava lur raiun inagada senza dubi era las veglias uclivettas da Bagliel e Nislas. S'entelli che Sep Antoni Deragisch bab (1815) e fegl havevan buca mo in fuorn per barschar vischala da tiaracotga a Bugnei. Ditg ha igl uler duvrau roda d'aua e molas per moler fin la mischeida d'arschella, da minerals e d'otra materia prima necessaria per far caffetieras, ruogs e scadiolas.

Surrein

il pign vischinadi vieifer Sedrun, dueigi haver fatg pli da vegl diever d'in fallun cun rod'aula situaus silla pastira giudem il Drun. Mulin ha Surrein denton giu in sigl agen intschess, a Prau Mulins oragiu sut Claus

(stau habitau inagada). 1950 era siu sulom denter la senda da Cavorgia ed il Rein da Nalps aunc veseivels. Mo ils 1957-60 eis el vegnius cuvretgs cun material scavaus ord la gallaria Sedrun-Medel dallas ovras electricas Reinanteriur.

Surrein ei sco fatgs per ina scappada enasi Pardatsch. Silla via carrabla dad oz ei quei ina trapla. Pli grev eisi da fastisar las caltgeras e falluns, duas veglias explotaziuns daditg serradas ed emblidadas. Alla tscherca da metals han ins avon tschentaners pisau crappa dallas cavas da Palits, giu sper il Rein da Nalps secapescha e buca silla spunda spuretga, dil Tgom nua che l'actuala carta naziunala 1:25 000 (Oberalppass) situescha ils anteriurs falluns.

Ins stuess strusch repeter che la Val Tujetsch ei stada neu e neu reha da minerals e cristallas. Perschadius da quei fatg ha pader Placi a Spescha deplorau zun fetg ch'in mulin da mular quella crappa preziosa maunchi ella val. Ch'ina tala industria fussi da grond nez e purtassi buna occupaziun ha el scret 1805, il medem onn ch'el ha sviluppau siu plan per in habitadi tuatschin propi segirs da lavinas e bovas. Siu vitg - en nos dis tuttavia buca schi utopics sco inagada -, previus en in rombus da dem Camischolas entochen si Salins, havess era giu da cumpigliar mulins, resgias e fravias d'aua.

Cavorgia

Ils avdents da Cavorgia e Cavorgia Sura, in'ucliva svanida mo che dumbrava aunc treis fiugs cun 20 persunas ils anno 1768, eran bi leds da posseder in agen mulin e fallun en ina distanza bein contonscheivla. Ils indrezs ein stai da vegl enneu ella Val Gierm sper la veglia via da comunicaziun Tujetsch-Medel-Lucmagn. L'installaziun dalla quala ins seregorda il meglier ei vegnida translocada anno 1885 da Rueras oragiu Maunsut, finfatg per remplazzar in mulin vegnius vegls e caducs. Ludovic Hendry, che ha cumpignau tontas gadas siu bab Giachen Martin (1873-1935) o Mulin, descriva quei «cundrez caussas primitivs che funcziunava adina» en sias enconuschentas «Verduras dalla notg». Igl indrez haveva in inschigneivel sclusaduir, vul dir ina palalenn che serrava giu l'aua aschiprest che la termosera svidada. La semplera roda bassa cun sias grevas palas cantunusas embratschava il ferm arver vertical che rotava sil plumatsch d'in diraglia crap.

Il fallun da treis pisuns, che teneva cumpignia al mulin o la Val Gierm, denton ver 20 meters sur lez, era endrizzaus per fullar glin e pisar semglin. Il vegl cundrez da struclar o ieli, munius d'in torchel d'agra, ei staus biars onns el pierti dalla casa da scola.

Schiditg che la cultura da garnezi e glin ha fluriu havevan bein tuts vischins ils medems dretgs vid mulin, fallun e pella. Las emigraziuns dils 1850-77 - en quels decennis ein pauc meins che 50 persunas idas ell'America - han fatg lartg a Cavorgia. Ils Hendrys ein daventai plaun a plaun ils sulets possessurs dil mulin. Treis generaziuns han dau cavegl cheu per cuntentientscha dil vischinadi: Luis, Giachen Martin ed il davos il Placi che ha tenu la dira entochen anno 1954. Mo allura eisi stau finiu cul far frina, ton cun quella da far paun sco cun la tut aparti buna frina da broda da Cavorgia.

Placi Hendry ei setratgs a Sedrun-Gonda ed ha piazzau sur sia casa la mola gronda sco cuzzeivla regurdientscha d'ina cultura morta ora. Il mulin bass da Cavorgia, lein dir sias capoparts, ei ius ils 1962 a Trun e vegnius montaus el Museum sursilvan. Igl ei d'engraziar all'iniziativa da Tobias Deflorin ed alla capientscha dalla famiglia Hendry che quei indrez genuin ei restaus ella Cadi. Il Museum retic a Cuera ei senezegiaus dil transfer ed ha schau far il cumpetent Adolf Gähwiler d'Aschera ina documentaziun detagliada. Ei resta denton aunc in niebel pensum als responsabels dil museum da Trun: dar a quei unic relict dalla cultura mulina il plaz che cunvegn ed aschuntar el medem temps las parts che mauncan.